

Atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut Kalaallit Nunaata ilanngunneqarnissaanik matumalu aalajangiiffigisassatut siunnersuutip akuerineqarnerata kingunitsianngua tamatuma sulissutigineqalernissaa aallartinneqaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Lyngø, Inuit Ataqtigiit)

Siullermeerneqarnera

Siunnersuuteqartumut, Pipaluk Lyngø, Inuit Ataqtigiit, Naleqqamiit qujaniarpugut.

Siunnersuut una siunertamigut pingaaruteqarpoq. Naleqqamiillu aamma pingaartinneqarpoq.

Atorfimmi peqquserlunnerup akiornissaa ullutsinni pingaartinneqartariaqarpormi.

Naleqqami isumaqatigiissutinut nunarsuarmioqatigiinnut ilanngunnissamut akerliunngilagut. Killormoqqissaq.

Isumaqatigiissutit taamaattut pingaaruteqarsinnaapput.

Nunatsinni aaqqissuussaanerup nukittorsarnissaanut aamma Kalaallit Nunaata nunarsuarmi akisussaassuseqartumik inissisimaneranut pingaaruteqarsinnaavoq.

Kisianni unneqqarilluta aamma oqaatigisariaqarparput:

Isumaqatigiissummik atsiorneq imminermi pissutsinik allannguinaaviangilaq.

Siusinnerusukkat siunnersuutip suliarineqarnerani tamanna aamma

erseqqissarneqarnikuvoq. Upernaami 2023-mi Naalakkersuisuunikut tamanna oqaatigivaat:

”isumaqatigiissummut ilanngunnerinnakkut atorfirmi peqquserlunnermik akiuisoqarsinnaanngitsoq aammalu ilaatigut isumaqatigiissummut ilanngunnissaq annertuumik piareersaataasumik suliaqarnissamik pisariaqartitsimmat ilaatigullu nalunaarutinik il. il. suliaqarnissamut sulisunik aningaasanillu immikkoortitsinissamik nassataqassalluni.”

Taamaattumimmi aamma Naalakkersuisuunikut atorfirmi peqquserlunginnissap aalajangersimasumik aamma aaqqissukkamik sulissutiginerusussimavaat Naalagaaffiit Peqatigiit isumaqatigiissutaannut ilanngunnissamik qinnuteqanngikkaluarlutik.

Siusinnerusukkut takoreerparput isumaqatigiissutit timitalersorneqanngitsut. Isumaqatigiissutit iliuuseqarfigineqanngitsut. Taamaattumillu siunertaarullutik. Naalagaaffiit akornanni maleruagassat akuersaarpavut. Kisianni piviusumik atuutilersitsineq amigaatigisarparput allaffissornermilu tassuunatigut siunertaqanngitsumik pilersitsilluta.

Eqqaamasariaqarparput una:

Kalaallit Nunaat inuisa pisinnaatitaaffii, Nunap Inoqqaaviusutut pisinnaatitaaffigut nunarsuarmi akuersarneqareersimapput – nunasiaataajunnaarnissamut namminiilivinnissamullu pisinnaatitaaffit aamma ilanngullugit.

Taakku pillugit isumaqatigiissutinik amigaateqanngilagut.

Politikkikkut timitalersuineq amigaatigaarput. Tamakkiisumik atuutsitsineq amigaatigaarput.

Taamaattumik isumaqatigiissut nutaaq pillugu oqallitsilluta immitsinnut aperisariaqarpugut:

Piviusumik iliuuseqarfiginissaanut piareersimavugut? – imaluunniit oqaatsinik kusanartunik nalunaaruteqarnissaq kisiat anguniarparput?

Siunnersuummi ajornartorsiutinik erseqqissunik tikkuussisoqarpoq.

Nunatta pisuussutai pillugit nunanit allanit soqutiginninnerup annertusiartornera, soqutigisaqatigiit akornanni aporaattoqarsinnaanera, aammalu pisortani atorfeqartut suliffeqarfinnut namminersortunut nuuttarnerat.

Tamanna eqqarsaatersuutaannaangilaq. Piviusumik unammillernartuuvoq.

Nalunggereerparpummi misissuinerit marluk ingerlanneqareersimasut. Misissuinerit taakku nunatsinni atorfimmi peqquserluttoqarsinnaaneq qanoq akiorsinnaagipput pillugu tikkuussipput.

Atorfimmi peqquserluttoqarsinnaanermut akiuisinnaavugut. Ataqtigiissaarinikkut, ammasumik ingerlatsinikkut aammalu akisussaaaffinnik erseqqissaanikkut.

Maleruagassat amigaatiginngilagut. Iliuutsit amigaatigaagut.

Tassa siunnersuut nutaajunngilaq. Siusinnerusukkut saqqummiunneqarnikuuvoq, kisianni piviusunngortinneqanngilaq. Ilaatigut Inatsisartunut qinersineq pissutigalugu, aammalu Naalackersuisut aalajangiinernut siusinnerusukkut pisimasunut ingerlateqqinnissaannut pisussaaffeqanngimmata.

Naleqqamiit taamani ataatsimiititaliami ilaasortaatitaqarsimangilagut.

Taamaakkaluartoq takusinnaavarput ataatsimiititaliap atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut nunatta ilanngunneqartariaqannginnissaa isumaqatigiissutigisimagaat.

Kalaallit Nunaat isumaqatigiisummut ilanngutissappat suliniutinik pinaveersaataasunik atuutsilersitsinissamut, pisortanilu ammasumik ingerlatsinerup annertusaanissamut Kalaallit Nunaat pisussaaffeqalissaaq.

Kisianni malittarisassat taamaattut nunatsinni atuutereerput.

Takusinnaavarput suliniutinik pinaveersaataasunik massakut atuuttoqareersoq.

Malittarisassammi pinerluttulerinermi inatsisitsinni inatsinillu allani ilaareerput.

Isumaqatigiisummut ilanngukkutta allaffissorneq sunniuteqanngitsoq annertusassavarput.

Naleqqamiit allaffissornikillisaaneq ujartorparput. Ukiut tamaasa allaffissornermut aningaasarpasuit atortarpagut kalaallinut nunatsinnullu iluaqutaanngitsut.

Siunnersuuteqartormi nammineq ilanngussimavaa aallarniutaasumik suliaqarneq aningaasartuuteqarfiussasoq.

Aningaasaatigut mississuinerpassuarnut pisariaqanngitsunut, isumaqatigiissutinut ilanngunissatsinnut sunniuteqanngitsunut kalaallinullu iluaqutaanngitsunut atorunnaarniartigit.

Kalaaleqatigut ilungersorput. Akit qaffakkiartorput. Pisortat aningaasarpasuit asuli atuunnaavittussaangilaat. Aningaasarpasuit allaffissornermut atortakkagut kalaaleqatitta atugarisaata pitsanngorsaannissaannut atorniartigit.

Naatsorsuutigaarput Naalackersuisuniit ammasumik ingerlatsineq qulakkeerneqassasoq.

Suliniutit Kalaallit Nunaanni pissutsinut naleqqussarneqarnissaat aamma naatsorsuutigaarput. Nunat anginerit allat ilaaginnarnagit.

Kalaallit Nunaata pisuussutai innuttaasut iluaqutigissappatigit, taava oqaatsit kisiisa naammanngillat. Isumaqatigiissutinut sunniuteqarpallaanngitsunut ilanngunissaq naammanngilaq. Politikkikkut piumassuseqarneq pisariaqarpoq. Pingaarnersiuiinermi salliutitsineq pisariaqarpoq. Iliuseqarneq timitalersuinerlu pisariaqarpoq.

Siunnersuutip siunertaa tapersorparput taamaakkaluartorli atorfimmi peqquserlunnerup akiornissaanut Naalagaaffiit Peqatigiit

isumaqatigiissutaannut nunatta ilanngunneqarnissaanik isumaqataanngilagut.

Naalackersuisut erseqqissumik piumaffigissavagut atorfimmi peqquserlunnerup akiornissaanut suliat malittarisassallu atuuttut malinneqarnissaat ataavartumik qulakkeerneqassasut.

Qujanaq.

